

# Tebusan: PM yakin semua pihak akan melakukan yang terbaik

KUALA LUMPUR 12 Mei – Datuk Seri Dr. Mahathir Mohamad yakin semua negara yang terlibat dalam mencari penyelesaian isu tebusan itu termasuk Filipina telah melakukan yang terbaik untuk menamatkan isu tersebut.

Perdana Menteri berkata, Malaysia, seperti juga negara-negara yang lain, mengharapkan beberapa perkembangan positif akan dapat dicapai dalam isu tersebut.

“Kita memang hendak melihat perkembangan positif (berhubung isu tersebut) dan kita tidak mahu menyalahkan sesiapa,” katanya pada sidang akhbar selepas selesai Perhimpunan Agung UMNO di Pusat Dagangan Dunia Putra (PWTC) hari ini.

Dr. Mahathir diminta mengulas sama ada beliau berpuas hati dengan usaha pihak-pihak terlibat dalam menyelesaikan krisis tebusan Pulau Sipadan yang kini masuk ke minggu ketiga.

Dr. Mahathir seterusnya berharap dan berdoa supaya terdapat perkembangan baru dalam isu tersebut tidak lama lagi dan seterusnya krisis itu dapat diselesaikan.

Krisis tebusan Pulau Sipadan yang melibatkan 21 orang termasuk 10 pelancong asing telah berlarutan sejak 23 April lalu.

Bagaimanapun, sehingga hari ini, belum ada tebusan yang dibebaskan oleh kumpulan Abu Sayyaf iaitu kumpulan pemisah di selatan Filipina yang bertanggungjawab terhadap penculikan tersebut.